

## **СВЯТОМУ ПРАВЕДНОМУ ОТЦУ НАШЕМУ ИОАННУ КРОНШТАДТСКОМУ ЧУДОТВОРЦУ НА ВЕЛИЦЕЙ ВЕЧЕРНЕ**

**Поем Блажен муж: 1-й антифон.**

**На Господи Возвах: Поставим Стихов 8, и поем Стихиры, глас 6:  
подобен: «Все отложше»:**

**1. Стих: Из** глубины возвах к Тебе, Господи, / Господи, услыши  
глас мой.

**В**ся житейская отложше, / единеми усты восхвалим / чуднаго светильника земли Российския и всея вселенныя, / пастыря доброго, пресвитера Иоанна, / светлый образ жизни во Христе нам явльшаго, / духом молитвы на земли пламеневшаго, / дар исцелений сугуб от Господа приявшаго. / Егоже молитвами / Христос во благочестии нас да утвердит / и чада непоколеблема церкви нас явит, / во спасение душ наших.

**2. Стих: Да** будут уши Твои / внимлюще гласу моления моего.

**В**сем сердцем и умом, Блаженне Иоанне, / житие во Христе возлюбил еси, / вся к богоугождению и мудрствуя и дея, / труды твоя богато священства благодатию плодоносил еси, / на вечера Господней, яко на небеси, / восхищенным духом со умиленными слезами / олтарю Господню день от дне предстоял еси. / И ныне в вышних предстояй Святей Троице, / молитвы вознеси, / да мир умирит и спасет души наша.

**3. Стих: Аще** беззакония назриши, Господи, Господи, кто постоит; / яко у Тебе очищение есть.

**П**утем трезвения духовнаго, благоговения, / таин Божиих созерцания, / исправления душевнаго и покоя в Бозе / чертога небеснаго достигл еси. / Деяньями милосердия и чудес твоих церковь украшается, / чистотою жития твоего нечестие посрамляется, / словесы твоих писаний вера утверждается. / Темже молим тя,

всечестне Иоанне:/ путевождь нам буди в наших обстояниях,/ да тобою наставляеми и заступаеми,/ Царствия Небеснаго сподобимся.

### **Ины стихиры, глас и подобен тойже:**

**4. Стих:** Имене ради Твоего потерпех Тя, Господи, потерпе душа моя в слово Твое,/ упова душа моя на Господа.

**В**сем сердцем болезнующа о тьме языков,/ мыслил еси первее ити в восточныя страны,/ зря же паче гиблемь близ сый Кронштадт,/ повинулся еси свыше зову,/ видением храма некогда во сне,/ Иоанне Праведне./ Знаю, рекл еси, священства высоту,/ уповаю же на Бога,/ вем бо яко Той есть крепость моя./ О любви божественная сила,/ ко Христу влекущая и утверждающая.

**5. Стих:** От стражи утренния до нощи, от стражи утренния,/ да уповает Израиль на Господа.

**В**сех вместивый в сердце пастырском,/ обязуя струпы нищеты,/ звал еси усты твоими и писаньми/ к созиданию жилища трудолюбия,/ да прибежище обрящут в нем убозии./ О учителю благих от веры дел,/ о питателю душ и телес убогих,/ Иоанне, радости отчаявшихся прежде./ Попечение о сих зде на земли/ образ бысть твоего заступления/ еже ныне на небеси.

**6. Стих:** Яко у Господа милость и многое у Него избавление:/ и Той избавит Израиля от всех беззаконий его.

**В**сем отверстым сердцем и сострастия исполненным/ дерзновенную стяжав молитву,/ и по смерти не престаеши сию свершая,/ и любовьию во веки богатея,/ источаеши цельбы и утешения всегда,/ Иоанне радостный и скорый помощниче:/ возложением руки целивый,/ прежде слова ведый нужды тя просивших,/ ныне нам невидимо предстани,/ в Христе живаго тя поющим,/ чающим твоея помощи и заступления.